

Euskarazko tesien VI. KOLDO MITXELENA sariak

Erabakia, 2018ko urriaren 25ekoa, Euskararen eta Etengabeko Prestakuntzaren arloko errektoreordearena, euskaraz idatzitako tesien seigarren KOLDO MITXELENA sarien deialdia egiten duena.

Universidad del País Vasco/Euskal Herriko Unibertsitatearen eta Euskaltzaindiaren arteko Lankidetzak Hitzarmenaren arabera, euskaraz egindako ikerketa bultzatzeko, bi erakundeek bi urterik behin euskarazko doktorego-tesien KOLDO MITXELENA sarietarako deia egingo dute. Hitzarmen honen Jarraipen Batzordeak deialdien gestioari, oinarriei eta hautaketa-prozesuari dagokion guztia ebatziko du.

Euskal Autonomia Erkidegoko unibertsitate-mailako ekoizpen zientifiko gehiena Euskal Herriko Unibertsitateak sortzen du. Ekoizpen horren adierazle nagusietariko bat UPV/EHU unibertsitatearen aurkezten diren doktoretza-tesiak dira, 400etik gora batez beste azken urteetan. Tesi horien artean berrogeitik gora dira euskaraz idatziak, bai erabat euskaraz idatzita daudelako edo, nazioarteko doktorego-tesiei buruzko araudiaren barnean, testuaren zati esanguratsu bat euskaraz dagoelako.

Euskarazko tesi horien ekarpena bikoitza da. Alde batetik, beste hizkuntzetan eginiko gainerako tesiek bezalaxe, jakintzaren sakontzea eta zabaltzea ahalbidetzen dute. Eta, beste alde batetik, euskararen normalizazioaren prozesuan ere ezinbesteko laguntzak eskaintzen dituzte.

Gure artean, Koldo Mitxelena zenak inork baino hobeto landu eta garatu zuen ekarpen bikoitza hori. Alde batetik bere lan bikainei esker euskarari buruzko jakintza zabaltzen eta sendotzen lagundu zuen, bai Euskal Herrian zein nazioarte mailako ikerketa-sareetan. Beste alde batetik, euskal hizkuntzak berak ez zuen lortuko gaur egun daukan garapena eta hedapena arlo akademiko eta zientifikoetan Koldo Mitxelenak egindako funtsezko lanak kontuan hartu gabe. Ekarpen horiek, besteak beste, Euskal Herriko Unibertsitateko bere katedratik eta Euskaltzaindian egin zituen. Irakasle eta euskaltzain bikainaren omenez, Koldo Mitxelenaren izena darama euskarazko tesien sari honek.

Horrenbestez, Universidad del País Vasco / Euskal Herriko Unibertsitateak eta Euskaltzaindiak honako hau adostu dute: bi erakundeek arteko hitzarmenean jasotakoa betetzeko, euskarazko ikerketa bultzatzeko eta sustatzeko asmoarekin, "Euskarazko Tesien Seigarren KOLDO MITXELENA Sariak" deitzea. Hori guztia kontuan harturik, honako hau erabaki dute.

ERABAKIA:

1. Helburua.

Xedapen honen helburua Euskarazko Tesien Seigarren KOLDO MITXELENA Sarien 2018. urteko deialdia egitea da.

Bost jakintza-arlo nagusietan emango da sari bana:

- Artea eta Giza Zientziak
- Gizarte eta Lege Zientziak
- Osasun Zientziak
- Zientziak
- Ingenieritza eta Arkitektura

2. Hautagaiak eta eskarien aurkezpena.

Euskal Herriko Unibertsitatean honako aldi honetan euskaraz idatzi eta defendaturiko doktorego-tesiak aurkeztu ahal izango dira: **2016ko irailaren 1etik 2018ko uztailaren 31ra bitartean**. Europar Tesi edo Nazioarteko Tesi gisa aurkezturiko tesiak ere onartuko dira, erabilitako hizkuntzetako bat euskara izan bada. Tesia defendatu duen doktoreak berak aurkeztu behar du hautagaitza, idatzi honi loturik doan eskabide-orria eta tesiaren kopia bat aurkeztuz.

Eskariak aurkezteko epea: **2018ko urriaren 25etik azaroaren 22a arte**.

Eskaria egiteko, deialdi honi atxikitako inprimakia erabili behar da, eta UPV/EHUko Erregistro Orokorreko bulego batean aurkeztu behar da (http://www.ehu.es/oficinas_registro.html), edo, hala badagokio, Herri Administrazioen Araubide Juridikoaren eta Administrazio Prozedura Erkidearen 30/92 Legearen 38.4 artikulua ezarritakoaren arabera.

Honako dokumentazio hau aurkeztu behar da:

- Eskabide-orria beteta.
- Tesiaren kopia digitala: pdf formatuan, pendrive-an.
- Nortasun Agiriaren fotokopia.
- Curriculum Vitae osoaren kopia digitala, bereziki hirugarren atalean aipatuko diren merezimenduei buruzko argibideekin.

3. Balioespen-irizpideak

Epaimahaiak ez du tesiaren edukia epaituko, tesian erabili den euskararen kalitatea baizik, eta, behar izanez gero, tesiak komunitate zientifikoan lortutako eragina. Horretarako, batez ere idazkuntza-moldea eta terminologian eginko ekarpenak hartuko dira kontuan.

Hizkuntzaren kalitatearen aldetik epaimahaikideek tesi bat baino gehiago berdin balioetsiko balute, honako irizpide hauek ere har litezke kontuan baremoa fintzeko:

- Tesian oinarrituriko argitalpen edo patenteen kopurua.
- Tesiaren edukiak hedatzeko asmoz kongresuetan eginiko aurkezpenak.
- Tesiak arlo zientifikoan lortutako eragina (tesiari buruzko aipamenak liburu edo aldizkarietan; doktoreak emandako hitzaldiak).
- Tesiarekin loturiko egonaldiak beste erakunde akademiko batzuetan.

4. Epaimahaia

Eskariak aztertzeko, epaimahai bat eratuko da. Honako kide hauek osatuko dute epaimahaia:

- 1-. Epaimahaiburua, UPV/EHUko Euskararen arloko errektoreordea, edo hark izendaturikoa.
- 2-. Epaimahaiburuordea, Euskaltzaindiaren Iker sailburua.
- 3-. UPV/EHUko Euskararen arloko zuzendaria.
- 4-. Hamar doktore, bost jakintza-arloetako bina (UPV/EHUko Euskararen arloko errektoreordeak izendatutako bana eta euskaltzainburuak izendatutako beste bana).
- 5-. Euskararen arloko eta Etengabeko Prestakuntzaren arloko Errektoreordetzako normalkuntzako teknikaria, idazkari lanak egingo dituen. Iritzia eman ahal izango du, baina ez du botoa emateko eskubiderik izango.
- 6-. Ohorezko buruak: UPV/EHUko errektorea eta euskaltzainburua. Ohiko bileretara joateko premiarik ez dute. Hala ere, epaimahaiburuak edo epaimahaiburuordeak eska lezakete bileraren batera deitzea, iritzia eman dezaten. Ez dute botorik.

Epaimahaiak, eskariak aztertu ondoren eta balioespen-irizpideak kontuan hartuta, sariak nori eman proposatuko dio UPV/EHUko Euskararen eta Etengabeko Prestakuntzaren arloko errektoreordeari. Epaimahaiaren ustez, aurkezturiko lanak saritzeko modukoak ez balira, sariak eman barik gera litezke.

5. Erabakia

Epaimahaiaren proposamena ikusirik, UPV/EHUko Euskararen eta Etengabeko Prestakuntzaren arloko errektoreordeak, Euskaltzaindiaren Iker sailburuarekin adostuta, dagokion erabakia hartuko du. Lanen egileei banaka jakinaraziko zaie saridunak direla, eta bi erakundeen webguneetan argitaratuko dira sarituen zerrendak.

6. Sariak

Irabazleek diploma eta 2.000 € gordin jasoko dituzte.


7. Erregimen Juridikoa

Deialdi honen oinarrietan argi eta garbi aurreikusten ez den kasuetan, honako hauek aplikatuko dira: azaroaren 11ko 1/1997 Legegintzako Dekretua (Euskadiko ogasun orokorraren antolamendurako printzipioen Legearen testu bateratua onartzen duena) eta abenduaren 17ko 698/1991 Dekretua, Euskal Herriko Autonomi Erkidegoaren aurrekontu orokorren kargurako subentzioen berme eta atzera itzulketen erregimen nagusia arautzen duena.

8. Errekurtsoak

Erabaki honek eta deialdi honen barruan hartutako gainerako erabakiek administrazio-bidea amaitzen dute. Haien kontra aukerako berraztertze-errekurtsoa ezarri ahal izango da, Euskararen arloko errektoreordearen aurrean, hilabeteko epean, erabaki hau argitaratu eta hurrengo egunetik zenbatzen hasita; administrazioarekiko auzi-errekurtsoa ere ezarri ahal izango da, zuzenean, dagokion administrazioarekiko auzi-jurisdikzioan, berdin zenbatutako bi hilabeteko epean.

Leioan, 2018ko urriaren 25ean.



Izptua.: / Fdo.: Jon Zarate Sesma

UPV/EHUko Euskararen eta Etengabeko Prestakuntzaren arloko
errektoreordea

